

### 3 მატჩი – 3 ფრე

11 აგვისტოს თბილისის „დინამოს“ ფეხბურთელებმა თავიანთი ბოლო მატჩი ჩაატარეს გერმანიის ფედერაციულ რესპუბლიკაში. ე. კარლსრუეში ისინი შეხვდნენ ადგილობრივ გუნდს – „კარლსრუეს“, რომელიც ერთ-ერთ უძლიერესად ითვლება თავის ქვეყანაში.

თბილისელებმა ასეთი შემადგენლობით ჩაატარეს მატჩი: ლეჟავა, ბ. სიჭინავა, ხურცილავა, ჩოხელი, ზეინკლიშვილი, გ. სიჭინავა, დათუნაშვილი, იამანიძე, კალოევი (ხუნდაძე), ბარქაია, მესხი (მელაშვილი).

პირველ ტაიმში ბრძოლას თანაბარი ხასიათი ჰქონდა და დამთავრდა უშედეგოდ – 0:0. შესვენების შემდეგ, მე-10 წუთზე ბარქაიამ ზუსტად გამოიყენა იამანიძის გადაცემა და გახსნა ანგარიში – 1:0. თბილისელებმა ეს ბურთი შეინარჩუნეს 89-ე წუთამდე, მაგრამ მაშინ, როცა თამაშის დამთავრებას აკლდა 30 წამი, ხურცილავამ და ლეჟავამ ცუდად გაითამაშეს ბურთი კარის სიახლოვეს, ლეჟავამ ვერ შეძლო შეეჩერებინა ბურთი ხელში და გერმანელებმა დაუყოვნებლივ გამოიყენეს ეს უხეში შეცდომა – 1:1.

14 აგვისტო, 1962 წ.